



DÏRE QU' ÈLES N' AVINT QU' A SÈRER LEÛS GGNOS... Èsse qui c' èst Bén lès inglès qu' ont invanté l' pitit cazakin d' cawoutchou ? Aloz sawè. Todi è-st-i qui parètrève qu' lès bauchèles è l' Albion ont d' droles d' idêyes po nén s' trover pîje èt d' ratinde famile. Insi, po s' lèyî bouter sins l' peû d' si rtrouver avou in Tchanchèt dins l' ridan, ont-èles sogne d' s' achîre dsu in botin d' tèlefone. Mins, come i gn'a pu wère d' ôbète avou l' mirakuleû lîve, à l' place èle tûtenut do lacia (ça dwèt ièsse malauji di n' nén glèter ?) tot fyant l' ake ! I gn' arève min.me à crwère qu' ça sèrève asez d' sèrer lès ouy au bon momint... A cauze di cès crwèyances, dsus ène anêye, in cint mile di djon.nètes d' mwins d' dîj-noûf ans si sont r'trovêyes momans.

*

SI VOS PASOZ PA L' AFGANISTAN, waîtoz à nén awè dès pâdjes di RABULÈTS dins vos pakèts ! Avou c' qu' nos n' ricolons nén à mète didins, vos vos frîz calindjî. Après-awè mètu djus lès mêrpostûres di Bouda, lès talibans disfindus d' apwârter èt d' awè dins leû vichnauve : dèl tchaur di pourcha, do pêkèt, dès lîves-à-touches, dèl coleûr po lès ongues, dès indjoles à muzike, dès antin.nes po lès-ondes, dès bindes po bwèsses à imaudjes, dès djeus d' couyon ouco d' rami (lès djeus d' bataye, zèls...), dès biyards, dès èwîyes po lès lavalîères, dès postûres di vitrines... Li liste dès cayèts disfindu èst co longue. Fyoz in distoû !

*

TOT CAUZANT D' DISTOÛ. On comince à l' sawè qu' lès feûmes n' sont nén au Paradis è l' Afganistan mins, c' n' èst nén qu' là qu' èles son-st-oblidjîyes di s' muchî cwâr èt mouzon. I n' vos faut pu è nnd' aler si lon. Pus près, à Graz, è l' Ôtriche, l' mayeûr "invite" lès comère à s' coviè èt s' moussî Bén lon "po n'nén doner dès idêyes aus omes". I trove qui, di totes lès façons, èles ont mia à fé qu' bèrôder d' sus lès voyes èt qu' èles ont à d'mèrer dins leûs cujènes à s' occuper d' leûs-èfants. Po l' momint èles polenut co aler à scole...

*

QU' ARÈVE DIT BÈATE ÛZE d' cès sujèts-là ? Rimimbrèz-l' ? C' èst l' almande qui, dispû 1943, s' ocupève d' pulules, d' chapiôs d' cawoutchou inglès èt d' èrotikes agayons. Èle vént d' moru. A 81 ans, èle èstève à l' tièsse di 93 botikes do sèkse èt fiève co dès voyâdjès (po sès bias ouy ?) au brès d' mimbrus djon.nias. Hugh Efnêr (Plê-bwès), li, s' pwate co Bén ètou, parè-t-i, avou lès djon.nès robètes.

*

CUBA SI ! MINS NÉN POR LÈYE ?

Ça done à tûzer quand on aprind qui l' fèye da Fidèl Castro dimère à Miami, U.S.A. Èle î boute dins ène pitite sicole po l' z-èfants. Juanita, l' prope soû do "Comandante" a èto s' maujone è l' Florîde. Elian, qui s' moman avève dins l' idêye d' lî bati vèla in mèyeû novia lèdwin, li, c'èst s' postûre qu'on l' î a bati, à Cuba.

*

ÈWOUSKON VA ? Èskonîva pu rade ?

Vola qu' è l' Ostraliye on èst dsu l' voye di trouver l' moyin di s' passer

do "foute" di l' ome po lès feumes awè dès èfants. È tchipotant co ène miète, on va-t-ariver à stichî dins lès oûs d' ène fumèle in p'tit bokèt d'ène ôte

fumèle èt insi nos fabriker dès èfants sins qui l' maûle euche à î mète li... pîd ! Parètrève qui ça-z-a dèdjà

cauzu roté avou dès soris. L' grand mèsse d' avant Confucius, l' chinwès filosofe Wêt-a-Ti Kil Tchén Tagne a bau, awè tot



platmint dit dins sès apocrifès èt fwârts maus conxhus sicrijêdjes, "*Tot seû obén à sakantes, ti n' a mauy qui l' bén ki t' fait à ti-min.me...*", si ça continuwe à roter dins cès novèlès orbêres là, si nos chûvants n' volenut nén s' continter d' matante pounèt, i von-t-awè à djower deûr do bordon po z-aurder leû place au solia d' l' ahèssâdje acoplé.

*

BÉN SÛR QUI VOS SAVOZ qu' i gna au dzeû d' vos tièsses ène sipècheû d' ozone qui prind sogne qu' vos n' fuchîz nén rosti pau solia. Vos savoz èto qui ddins lèye, au dzeû d' l' Antartike, i gna in fameû trau a 'alaurdji à cauze di nos spitchroules à fé tnu lès tchvias èt dès fumêres qui muchenut foû dès bûzes di nos-otos. Figurèz-vos qu' èle Novèle-Zèlande, dès sincieûs-cacheûs ont soflé dins in balon èt l' fé èvoler au dzeû d' in pré èvou pachîne dès vatches. Lès indjoles dins l' dirijâbe, batîjî "Kytoon" (i duvéve awè dès walons dins l' binde !) ont trové, après tot in mwès è l' êr, qu' lès gâz dès mawiâdjès èt pètlèdjes dès bièsses à cwanes èstins dès pus mêrmwès po l' coûtche d' ozone. Pîre qui totes lès mwêjtés lachîyes pa leû-z-industriyès, stûves èt z' otos. Po leû payi, l' paurt dès bièsses dins l' ozonike trawèdje sèrève di nonante au cint. N' rioz nén, c' qu' ètou vos vèssoz après ène boune sope aus nintes à lès min.mès consèkances èt a, tot parêy, ène durêye di vikêrîye di 150 ans dins l' êrâdje ! Rindèz-vos conte, qu' bén ostèyî, on poréve vos sinte si lontimps après qu' vos fuchîz, p'tète, à costé do bon Diè ?

*

AU MWÈS D' JANVÎ 2001, on vos avéve fait profiter d' ène faûve qui nosse moman èstéve acostumêye d' raconter à totes lès tauvlêyes d' fièsses. **LÈS CÈRÎJÎS** qu' ça s' loméve. In d' nos djintis lîjeûs (*On grand merci, à Guy; on lî promèt ètou in bètch di bistoke au Novèl-an*) à r' trové dins in vî lîve di 1874 in tèxe aparinté. I dateréve do comincemint di *dj-ût* cint èt vinéve tot dirèk di... **Djivèt** ! On vos l' done dins l' ortografe di c' timps-là. D' avant Fèlêr, èndon :

L' tite duvéve (?) ièsse :

L' CÈRÎJÎ

Accoroz, vaijin Biétrumet
Vinoz vaici pou m' consolet.
D'jai pièrdu mi galant Diame
Que d'jaimais d'jusqu'au fond di m' name
Il a t'cheû d'on cèriji
Il est tout discoubouridchi.

Si m'galant a sti toè,
Çà sti à cause da noss curè,
I v'let qu'les d'jones fiies
Tairaient li d'chaule ou bin li squie
Et qu' les d'jonn hommes montrait dissu
Su l' cèriji benne attindu

D'jasté bin pu au faite qui li
Di montet sur les ceriji,
Mais les d'gins auraient polu dire
Qui savaient véiû mes d'jartires,
I l' y a montet po s'grand malheur
Et c'est cèla qui m'crèfe li coeur.

Nos d'vins no marii après-d'moin;
Ç'astait li souhait di ses parains,
Nos d'vins no marii à l'sourdine
Di peu qui l'mont ni no badine
Mais v'la bin un grand cand'jmint,
I faut z'allet à s't'intermint !

On nos èsplike qui : Biétrumet = Barthélemi; Diame : Guillaume; "t'cheû" vént di "choir"; "squia" = civîre. On nos dit ètou qu' dins l'vichnauve di Djivèt, "u" s'prononce "ou", "ch" d'vént "tch", "j" èt "g", font "dj" "dg".

Mi, dji m' va riléver : "d'jones fiies" èt "d'jonn hommes" èt vos d'mander si vos savoz c'qui ça vouréve dire "s'marier à l' sourdine" èt "l'mont qui nos badine" ? Esseki l' bauchèle avéve "agnî dins l' pome" èt qu' èle poléve awè bén rade "in mont qui l' bodène" ?

Dj'a vèyu qui lès deûs dêrin.nès lignes do prumî coplèt richènenut à l' fèn dèl fauve da m' moman. L' istwêre, lèye, n' î rixhone nén.